
RECENZIJA

DR MUHAMEDA MUJAKIĆA

Zbornik Instituta za uporedno pravo iz Beograda „*Uvod u šerijatsko pravo*“ predstavlja jedan u nizu zbornika ovog Instituta koji daju osnove određenih pravnih sistema. Ovaj zbornik po svom sadržaju sa svim autorskim radovima doista predstavlja važan i koristan uvod u šerijatsko pravo. Danas islam predstavlja univerzalnu religiju koja, kao takva, ima i svoj uređen normativni pravni sistem, vrstu *kanonskog* prava, koje je u islamu poznato kao šerijatsko pravo. Osnovni izvori šerijatskog prava su svakako Božija objava čovječanstvu sveta knjiga Kur'an; potom *Sunnet*, tj. praksa, kazivanja - hadis i djela posljednjeg Božijeg vjerovjesnika čovječanstvu, ljudskom roku Muhammeda a.s.; Idžma tj., saglasnost učenjaka o nekom pravnom pitanju i *Kijas* tj. analogija. Šerijat u užem smislu znači skup svih pravnih normi sadržanih u svetoj objavi Kur'an i Sunnetu Muhammeda a.s. Radovi u Zborniku nude opšti uvodni prikaz u šerijatsko pravo, izvore šerijatskog prava, šerijatsko pravo u kontekstu sunitskog shvatanja, šerijatsko pravo u Iranu kao kontekst šijskog shvatanja šerijatskog prava, te uvod u grane šerijatskog prava, kao što su šerijatsko krivično pravo, osnove šerijatskog finansijskog prava, osnove šerijatskog bračnog prava, osnove šerijatskog nasljednog prava, osnove islamskog bankarstva, novi pravni instituti u šerijatskom pravu kao što su *takaful* i *retakaful*, osnove parničnog postupka u pozitivnom šerijatskom pravu nekih od država koje primjenjuju šerijatsko pravo (Saudijska Arabija). Ono što je važno za šerijatsko pravo jeste da je ono danas primjenjivo pravo, pozitivno pravo u većini islamskih država, a da se, posredno, individualno/porodično primjenjuje u svim državama svijeta gdje žive muslimani. Tako, na primjer, iako su pravni sistemi u Srbiji i Bosni i Hercegovini sekularni i nisu zasnovani na kanonskim pravima, muslimani pored sklapanja svjetovnog braka mogu sklapati i vjerski šerijatski brak ili na primjer, prilikom nasljeđivanja raspolaganje nasljedstvom se može bazirati i po osnovama šerijatskog nasljednog prava, a da isti principi ne odudaraju od pozitivnih propisa iz oblasti nasljeđa i dr. Stoga ovaj Zbornik toplo preporučujem, pored nekih kapitalnih dijela na našim prostorima, kao veoma korisnu literaturu koja uvodi u ozbiljnije i dublje naučno istraživanje sve zainteresirane.

Recenzent
dr.iur Muhamed Mujakić
Pravni institut u Bosni i Hercegovini